

四庫全書

史部

欽定四庫全書

史部

皇朝文獻通考卷三十二

內閣中書_臣實汝翼覆勘

總校官中書_臣孫溶

欽定四庫全書

皇朝文獻通考卷三十

征權考

五

權酤

康熙二十八年飭禁

盛京多造燒酒糜費米糧奉

諭旨近聞山海關外盛京等處至今無雨尚未播種萬一

不收轉運維艱朕心深為憂慮且聞彼處蒸造燒酒之

人將米糧糜費頗多著戶部侍郎賽弼漢前往奉天會同將軍副都統侍郎等嚴加禁止旋以奉天府府尹王國安

陸辭復

申諭之

乾隆二年除東安等六縣油酒稅銀長蘆鹽政兼管天津關稅務準泰奏言天津關稅務除各處口岸征收稅銀外更有離關窩遠之油酒稅銀一項

向例按季差役給發印票分往東安武清香河永清寶坻及寶坻新分之寧河縣各城鄉地方挨查油酒鋪家每鋪收錢多寡不等伏查東安等六縣相距津關自八十里至一百四十里不等所有油酒鋪家及本地居民不比過關商販且時歇時開額無一定該差持票遠出勢必苛求勒索擾累無窮雖相沿日久實屬陋例請將天津關按季差役分往東安等六縣查收油酒稅銀之處永行停止

戶部議准得

旨允行

又酌定北五省燒鍋躉麪之禁總理事務王大臣等奉

上諭禁止燒鍋一事朕從前降有諭旨因孫嘉淦條奏復令王大臣九卿集議續經兩議具奏朕又降旨令其確議今思禁止燒鍋乃關係民生日用之事督撫大臣所當悉心籌畫者著交直隸河南山東山西陝

西等省督撫具奏仍下原議之王大臣等會議尋議
民間私開燒鍋耗費糧食向經屢行禁止我

皇上廣詢博訪察兩用中令河北五省督撫各就地方
民生日用之情形據實陳奏有請仍照舊例查禁
者有請宜寬於豐年而嚴於歉歲者有請不必禁
止者有請永行嚴禁者有請嚴禁肆行躡麴興販
者實皆體民之情因地之宜以各抒所見也伏查
直隸總督疏內以燒酒之禁宜嚴於歉收之年稍

寬於豐裕之歲本地釀造與零星造麴者毋庸禁
止其麥麴燒酒槩不許出境如肆行躡麴興販者
應行嚴禁并稱富商大賈之興販既絕則本地之
所銷自少河南巡撫以行法宜因乎地而立禁先
清其源豫省酒多自造比戶皆然請免零星製麴
之查禁而廣收多躡販賣者應行嚴禁躡麴不行
燒鍋可以漸減甘撫以甘省並非產酒之區毋庸
嚴禁陝撫則以為陝省俗儉民間祭祀慶弔等事

不得已而用酒若禁燒酒而用黃酒則專用米穀
細糧轉於民生未便況臨邊地冷兵民藉以禦寒
勢難槩禁惟躑躅開行遠販者嚴加禁止陝督則
以為燒鍋當禁而不可以必禁禁之所以節流寬
之所以去擾惟歉年自宜禁令加嚴其躑躅開行
遠販者宜嚴行禁止山西巡撫以晉省燒鍋可寬
於豐年應禁於歉歲小民自宜遵守至山東巡撫
因本歲二麥偶旱嚴禁燒鍋躑躅竟有毀棄釀具

者有改業者有自行出首者亦已行之著有明驗
臣等公同詳議因地制宜者國法之備因時立法
者王政之經王制有曰修其教不易其俗齊其政
不易其宜謂凡居民服食器用之不能畫一也燒
鋤一事各省之情形不同所以各省之陳奏亦不
能畫一各就其土俗民情熟籌詳酌據實陳奏自
必確有所見較之憑虛懸擬者自為親切應照所
請即令各於本省因時制宜實力奉行以觀成效

至躉麴一項係燒酒盛行之源躉麴多則私燒必
廣有損蓋藏且富商巨賈肆行躉麴廣收販運易於
查拿不致滋擾禁之以清其源裨益甚大各省督
撫陳奏衆論僉同均無異說亦應如該督撫所奏
凡富商巨賈廣收麥石肆行躉麴大開燒鍋者嚴
行禁止但該督撫等所請治罪之處均未畫一查
違禁私燒者向例俱照律杖一百今將躉麴販運
之處嚴行禁止如仍一體懲治實不足以示儆應

將廣收麥石肆行躡麪大開燒鍋者杖一百枷號
兩個月其官員處分應照吏部原議失察之地方
官每一案降一級留任失察至三案者降三級即
行調用如官吏有賄縱等弊照枉法律計贓論罪
從之

五年禁畿輔燒鍋躡麪耗費糧食御史齊軾奏稱
今秋收穫較往歲為豐畿輔盈寧視外省為更盛
惟是商賈雲集嗜利多人而麪藥一端耗糧最甚

雖禁令已經詳定而農場多粟必樂於聚財倘奉行一有廢弛則以酒居奇者必以糧覓利竊見近日京師九門每日酒車銜尾而進市價甚賤為數年來所無是必網利之富賈販酒者多故其價大減亦必附近之州縣私燒者衆故車載日盛也應請

勅下近省督撫轉飭所屬地方恪遵定例實力稽查奉諭旨齊軾所奏甚是秋成豐稔之時正宜講求民間儲

蓄之計著孫嘉淦轉飭所屬地方官窮緝治罪不得姑容至於零星沽賣者不必過為深究倘因降此旨將二三無力小戶查拿以為塞責之具致使閭閻滋擾而奸商巨販轉以納賄於官吏而脫然事外藐法公行則州縣官之咎更不可逭可傳諭直隸及隣近省分一體遵行

八年

勅免通州油酒等項征納額稅總督倉場侍郎覺羅吳

拜奏通州稅務經前道祝兆熊任內以芝蔴麥子
生豬已按石按口報納額稅而磨油磨麪屠宰鋪
戶又納季鈔似屬重複其燒黃酒零綢故衣帽鋪
念係小本貿易經營餬口將一切所征鋪戶季鈔
名色盡行革除具詳前任直隸巡撫批行勒石永
禁至雍正五年前任坐糧廳顧琮等查明故衣零
綢鋪戶各稅照舊抽收至乾隆七年經現任坐糧
廳恩特等檢查部頒則例所載磨油鋪戶每月報

油四簍每簍正稅銀一錢五釐通灣酒舖戶上戶
每月稅銀一錢五分中戶一錢下戶八分通灣糖
房舖戶上戶每月稅銀三錢中戶二錢下戶一錢
仍令按款報納查通州稅款內之油酒糖舖各稅
雖所抽數屬些微但以部冊開載之款向來未經
題奏即行批禁殊屬不合奏請交部議覆得

旨免其納稅

十四年禁運販紅麴紅糟分別治罪輕重例福建

布政司永寧奏言躉麪一項久奉禁止但麪原以
麥製造是以直隸山東河南江南等省產麥處所
造麪者多至於閩省種麥原屬稀少民間造酒不
用麥麪而以米為之其名紅麪蓋麪價較之米價
頗昂小民於秋收之際不知珍惜每多製造紅麪
以圖厚利訪得古田屏南永安平和等邑并汀邵
二府各屬縣是處俱有歲耗甚多又聞建安縣之
南臺里地方專以上躉食米製造紅麪凡造紅麪

者又必先買紅糟方能造麴歷來雖經飭禁無如趨利之徒仍多不遵請以民間零星自用者免其查禁如多為製造船裝運販者槩行禁止如運販五百觔以內及廣收米石製造運販一千觔以上者分別治罪紅麴變價入官地方官失察賄縱俱論如法疏入下部議行

臣等謹按周書有羣飲之戒周官有幾酒之條蓋以德將無醉戒彼沉湎者流而酒醪糜穀則亦漢

詔所諄諄也自漢孝武權酤以後或占租以市酒
或列肆以聚羸或按月以納酒錢或逐月以充市
絹甚者官自造酒而禁民之私酤吏主釀務而課
民以入直至宋熙寧年間酒課歲額有至四十萬
以上者鬻樵雇薪抑配白納或且有算畝起派反
過正稅又其甚者矣我

朝本無權酤之官其天津六縣及通州酒稅有司以
聞即蒙

恩免惟念釀酒之家耗費米糧禁北省躉麴燒鍋集廷
臣及外省督撫酌中定議官不利其所入而為小
民籌蓋藏之計至詳且盡因歲收之豐歉以為禁
約之寬嚴因販麴之多少以為論罪之輕重蓋養
民者使其自養愛穀者去其害穀猶是周書誥戒
小子及漢初羣飲罰金之遺意焉

四十五年戶部議杭州織造徵瑞言北新關收稅
舊例每烟百觔稅銀四錢六分酒十罇約計二百

勛稅銀二分今部頒則例刪併兩項並每百勛稅銀四錢均有窒礙應如所奏仍照舊例辦理從之
推茶

順治二年定陝西茶馬事例先是元年定與西番易馬每茶一篋重十勛上馬給茶篋十二中馬給九下馬給七至是差御史轄五茶馬司戶部言陝西召商茶以易番馬向有照給金牌勘合之制查前明詔諭通接西番關隘處所撥官軍巡守不許

私茶出境凡進貢番僧應賞食茶頒給勘合行令
四川布政司撥發庫茶照數支放不許於湖廣等
處收買私茶違者盡數入官仍將伴送人員治罪
此舊例之可行者若金牌一項係明初事例永樂
十四年已經停止我

朝定鼎各番慕義馳貢金牌可以不用但以茶易馬
務須酌量價值兩得其平無失柔遠之義從之

三年免茶馬增解額數茶馬舊額一萬一千八十

八匹自故明崇禎三年增解二千匹所增馬匹究竟年年虛額無濟軍需茶馬御史廖攀龍奏請永行蠲免從之

七年定陝西茶引從部頒發例巡視茶馬御史吳達疏言陝西茶引明季係茶馬御史自行印發故引有大小之分又有大引官商平分小引納稅三分入官七分給商之例今引從部發俱應照大引例官商平分以為中馬之用報可

康熙三十四年

勅遣專官管理茶馬事務戶部議覆刑科給事中張元佩
條奏馬政事關緊要洮岷諸處額茶三十餘萬篋
可中馬一萬匹陳茶每年帶銷又可中馬數萬匹
查茶餉中馬甚有裨益應將額茶中得之馬給營
驛外其餘馬每年交秋將數千匹送至紅城口等
處牧放得

旨茶馬事關緊要著遣專官管理

三十五年飭准打箭爐番人市茶貿易四川巡撫
于養志遵

旨會同烏斯藏喇嘛營官等查勘打箭爐地界奏番人藉
茶度生居處年久且達賴喇嘛曾經啟奏准行應
仍准其貿易理藩院議准從之

四十四年停止巡視茶馬官員歸甘肅巡撫兼管
先是三十六年專差部院管理茶馬事務至是年
復歸巡撫兼管因招中無幾西寧等處所徵茶篋

停止易馬將茶變價折銀充餉至雍正九年奏准
五司復行中馬之法每上馬一匹給茶十二篋中
馬一匹給茶九篋下馬一匹給茶七篋俟一年之
後計所收馬匹即留甘省軍營之用或馬數甚多
分撥河南山西就近喂養十年奏准中馬之法應
見馬給茶至十三年仍復奏明停止

五十八年准裡塘巴塘地方買運茶餉議政大臣
等議覆都統法喇疏言蒙古地方及西藏人民皆

藉茶養生松潘一路茶價甚賤青海一帶積茶必
多應暫行禁止俟其懇請時再酌定數目令其買
運至打箭爐外最近者為裡塘遣官招撫令營官
造具所管番寨戶口清冊酌量定數許其買運巴
塘以外亦照此例其打箭爐一路當視番情之向
背分別通禁應如所奏從之

互見市
雜考

雍正八年定川茶征稅例奉

諭旨川茶皆論園論樹以定稅額夫茶樹有大小不同園

地有廣狹不一若槩以園樹之數為額未為允當應將
茶稅照觔兩收納方得其平著該撫詳議經戶部議准
四川撫臣憲德疏言川省行茶原額新增共邊腹
土引八萬五千三百四十四張納課銀四百二十
四兩計算每觔止納課銀四絲九忽零實屬太輕
今該撫定以每觔一釐二毫五絲令各商人在於
茶價銀內扣存即隨引稅赴地方官照數完解所
議甚為妥協應令該撫將前項權課銀一萬六百

六十八兩按年造入奏銷冊內具題查核再查陝
西行茶定例每引一道運茶百觔每茶一千觔准
帶附茶一百四十觔如有夾帶即以私茶論罪今
該撫請加耗茶一十四觔如有多帶照私鹽例治
罪地方官有故縱失察者照失察私鹽例處分仍
令該撫將行茶商人姓名並產茶州縣權課細數
造冊報部得

旨允行

十年准預頒四川省行茶引張隨時給發四川巡撫憲德疏稱川省行茶原以部引為憑自應請引行運但口外番彛貿易多寡內地州縣無從查考或見番客雲集茶觔易售方請增引如必候部頒發則番客已去各商未免畏阻不前請於額頒之外預頒茶引五千張收貯巡撫衙門俟有請增州縣一面題報一面即將部引給發下部議行

乾隆六年酌減四川松潘地方行查邊引戶部議

覆四川巡撫碩色奏請酌減松潘茶引一案查川
省松潘地方行茶邊引原額一萬三千七百六張
已儘足行銷原無引茶不敷買食之處後因天全
州土商濫請增給土引以致積滯經前撫臣楊昉
題准改撥各州縣代為分銷維時成都等縣商人
因松潘修城之時番民聚集傭工茶勛易銷定為
常額是以成都縣撥銷土引六百張彭縣八百一
十一張灌縣三千六百張崇寧縣一百八十張石

泉縣一百六十二張安縣二百六十四張俱改照
邊引納稅於松潘行銷年來城工告竣番民陸續
回巢茶觔漸至壅滯應如所請將成都等縣積引
量減四千四十九張併課稅銀兩一併照數開除
從之

又准甘省官茶辦交本色先是甘省官茶因停止
招中馬匹節經該撫題明將官茶改徵折色陳茶
定價發變俟各司銷存至六十萬封上下題徵本

色至是護撫徐杞以各司銷存庫茶止九十二萬餘封迨新茶辦運到甘陳茶接續分銷可存六十萬封上下請仍令商人辦交本色從之

八年豁免川省茶引未完銀兩奉

諭旨前因川省松潘引多茶壅故將天全州之積引改撥成都彭灌等縣行銷每年空繳引張賠納稅課官商交累乾隆六年朕降旨開除成都彭灌三縣積引四千四十九張并課稅銀二千四百一十七兩二錢

從乾隆七年為始官商俱受其益惟是乾隆七年以前之羨餘截角尚屬拖欠成都彭灌三縣均有未完銀兩川省茶商資本微薄無力復完舊項朕心軫念著將所有三縣舊欠悉行豁免

二十四年准甘肅五司茶封搭放各營俸餉戶部覆准甘肅巡撫吳達善奏言甘省交庫茶封日積酌議設法銷售經前任布政司明德酌請每封或定價銀六錢運赴甘肅安三處變價三年以來僅

銷茶一萬餘封現在各司庫貯茶尚有一百四十餘萬封宜亟為籌畫檢閱舊案康熙三十七年因甘司茶封無馬可中貯庫年久經督理茶馬事務內閣學士錢齊請於五鎮俸餉馬乾之內銀七茶三搭給今五司存貯茶封自應照此辦理惟是甘省滿漢各營每年需茶若干難以懸揣自乾隆二十五年春季起令其按季自行酌定茶數總以一二三成搭支銀兩在於司庫請領即於附近五司處

支給從之

二十五年奏定洮河二司茶封歸甘莊二司辦理
戶部議覆甘肅巡撫吳達善奏言甘省茶課向為
中馬而設故每年額引二萬七千二百九十六道
內分西司九千七百一十二道坐落西寧府洮司
三千三百道坐落岷州河司五千一百三十二道
坐落河州莊司五千一百五十二道坐落平番縣
甘司四千道坐落蘭州府今中馬之例久停在甘

莊二司係各處衝衢西河二司附近青海常有銷售之路惟洮司地處偏僻土瘠民貧故該司商銷茶酌歷年俱告改別司售賣惟交官茶封仍交洮庫徃徃積至數十萬封始請疏銷臣查甘莊二司地處衝衢撥用收支均屬近便應如該撫所請將洮司額頒茶引改歸甘莊二司給商徵課俟洮司庫貯茶封搭餉完日即行裁汰疏上如議行嗣於乾隆二十七年以河司雖附近青海蒙古而一切

交易俱在西寧從不一赴河州其情形與洮司無異亦行裁汰其額引五千道併歸甘莊二司

臣等謹按李唐回紇入貢以馬易茶宋熙寧嘉泰間相繼行之漸置茶馬之官至故明齎金牌三衛收馬給茶名曰差發其制中廢當時籌國者屢以為言然明政已弛竟不能復也我

朝定鼎之初差茶馬御史招商領引納課所中馬匹壯者給各邊兵牝者發所司牧養孳息順治十四

年以七監馬匹蕃庶凡茶馬變價銀兩改解充餉
康熙三十二年以蘭城無馬可中將甘州司積貯
茶篋銀七茶三用充俸餉蓋

本朝牧地廣於前代稍為孳息則已驪黃遍野雲錦
成羣今則大宛西番盡為內地渥洼天馬皆檻上
之駒中馬之制久停是以甘肅茶封恒苦於霉變
或變折價銀或以充俸餉甘省五司已裁其二尚
存甘莊二司及西寧一司頒引徵課亦以留中馬

之舊跡於不廢云

二十七年以茶勛積滯籌畫疏銷陝甘總督楊應
琚遵

旨條議甘省五司官茶疏銷事宜一官茶應改徵折價
也按甘省庫貯官茶向例如遇存積過多改徵折
色如庫貯無幾復請征本色今五司庫內自乾隆
七年至二十四年已存積至一百五十餘萬封經
前撫臣吳達善於二十四年奏准每封作價三錢

搭放兵餉以來當奉行之始兵丁領獲茶封尚有餘利今行之二年有餘已搭放過茶四十萬餘封現在市肆官茶日多非十年之久不能全數疏銷且每年商人又增配茶二十四萬餘封商茶既多官茶自必益加壅滯莫若將商人應交二成官茶五萬四千餘封暫停交納照例每封徵折價三錢俟陳茶銷售將完再行征收本色一商茶應准其減配也查甘省茶法商人每引交茶五十觔無論

本折即係額課此外尚有充公銀三萬九千餘兩
亦係按年交納無殊正供至商人自賣茶封每引
止應配正茶五十觔連附茶共配售三十餘萬封
該商等即以配售之茶完納前項應輸之課經前
撫臣吳達善奏准增配以紓商力並無課項第茶
封既已加增又有搭放兵餉之庫貯官茶勢致愈
積愈多難免停本虧折今酌中籌計商人情願每
引一道止配茶十五封內應酌減無課茶一十五

萬八千三百十六封共止配茶四十萬九千四百四十封至二成本色茶封現既酌議改徵折價自亦無庸配運一陳積茶封應召商減售也查各司俱有陳積茶封而洮司為最多該司地處偏僻定議搭餉計非數十年不能完現在每封四錢發售商民無利可獲裹足不前請仍照乾隆二十六年前撫臣明德原議每封定價三錢召商變賣河西二司共存茶六十餘萬為數較多亦佳其一體照

數售變一內地新疆應一體搭放也查乾隆二十四年前撫臣吳達善奏准滿漢各營以茶封搭餉至新疆地方茶餉一項向須取資內地誠如

聖諭各處濟用自屬多多益善今官茶以沿途站車輓運毋庸脚費其自肅州運至各處將脚費攤入茶本之內較之買自商賈價值尚多減省部議應如所請從之

二十九年免追浙省行銷順天茶餉殘引舊例浙

省行銷茶引令各商過關輸稅截角統俟茶飭售
完之日將所執殘引交原發衙門送部查銷嗣據
閩浙總督楊廷璋奏報浙省行銷口外等處引張
歷經收稅截角更由崇文門截去中間實無影射
情弊請將口外殘引免其繳部內地殘引即在行
茶處所催繳復據侍郎兼管順天府尹錢汝誠等
奏稱浙省乾隆二十三、四等年行銷順天茶引共
一萬九千餘道自淮浙省咨後即經照例查追迄

今日久大半多無着落推原其故實緣行茶與行鹽不同商無一定地任遷移殘引多隨客散查究無根難以追繳嗣後浙省行銷京城茶引應令崇文門於截去中間時即將所截引心彙齊送部查核其殘引一體免追以省擾累從之

三十七年戶部議前任總督阿爾泰奏南川縣地方產茶茂盛每年除配額引之外尚有餘積請自今始增茶腹引一百張照例徵收課稅應如所請

從之

三十八年戶部議四川總督劉秉恬等覆奏請嗣後三雜谷等處土司買茶以千觔為率使僅敷自食不能私行轉售從之

坑冶

康熙十四年定開採銅鉛之例戶部議准凡各省產銅及黑白鉛處如有本地民人具呈願採該督撫即委官監管採取至十八年復定各省採得銅

鉛以十分內二分納官八分聽民發賣監管官准按勛數議叙上官誅求逼勒者從重議處如有越境採取及衙役擾民俱治其罪

臣等謹按嗣後各廠之開閉視山礦之旺衰康熙年間如奉天浙閩諸省皆曾開採續經停止今則湖南雲貴川廣等處並饒礦產而滇之紅銅黔楚之鉛粵東之點錫尤上供京局者也大抵官稅其十分之二其四分則發價官收其四分則聽其流

通販運或以一成抽課其餘盡數官買或以三成抽課其餘聽商自賣或有官發工本招商承辦又有竟歸官辦者額有增減價有重輕要皆隨時以爲損益云

十九年定雲南鉛廠通商之例

詳見市
雜考

四十六年定雲南礦稅毋許加增戶部議雲南金銀銅錫等礦廠稅額應令該督據實查核加增

上諭大學士等曰雲南礦稅一年徵銀八萬兩零用撥兵

餉數亦不少若又令增加有不致累民乎此所得錢糧
即數所用矣本發還著照題議結

四十九年以

盛京部臣請改採鉛地方飭部議處工部議覆

盛京工部侍郎席爾圖疏言錦州採鉛請改於遼陽
採取得

旨採鉛事情前因白爾克條奏自遼陽州改往錦州大碑
等處今又因席爾圖所奏議仍在遼陽州採取前所奏

是則今所奏非今所奏是則前所奏非一切事務該部
當據理剖斷分別是非定議乃止據現在條奏草率議
准殊為不合凡部院及督撫官員更換一人皆如此頻
更舊例貽悞必多著嚴飭行

五十一年以四川撫臣能太摺奏

諭示廷臣奉

諭旨原任四川巡撫能太曾具摺奏聞開礦後又奏稱江
中有銀派官監視撈取以為兵餉朕以此二事俱不可

行隨硃筆批發朕乃人君豈有令江中撈取銀兩之理
觀此二事即知能太必貪督撫提鎮奏摺一二次可知
其行事也

五十二年奏准久經開礦地方分別開採其未經
開採者禁之大學士九卿等議覆開礦一事除雲
南督撫及湖廣山西地方商人王綱明等各雇本
地民人開礦不議外他省所有之礦向未經開採
者仍嚴行禁止其本地窮民現在開採者地方官

查明姓名記冊聽其自開若別省之人往開及本處殷實之民有霸佔者即行重處

上曰有礦地方初開時即行禁止乃可若久經開採貧民勉辦資本爭趨覓利藉為衣食之計而忽然禁止則已聚之民毫無所得恐生事端總之天地間自然之利當與民共之不當以無用棄之要在地方官處置得宜不致生事耳

雍正元年停止黔省開採銅礦貴州巡撫金世揚

疏稱黔省地處荒陬銅觔原無出聚間有一二礦
厯久經封閉若令開採鼓鑄無論工費浩大一時
難以獲效且貴州漢苗雜處每逢場市貿易少則
易鹽多則賣銀今使錢文漢苗商賈俱非情願若
以配充兵餉領運既難流通無時黔省用銀沿習
已久請照舊例停開下部知之

二年兩廣總督孔毓珣奏請於廣東開採以濟窮
民

上諭廷臣會議嗣奉

諭旨昔年粵省開礦聚集多人以致盜賊漸起隣郡戒嚴
是以永行封閉夫養民之道惟在勸農務本若皆舍本
逐末各省游手無賴之徒望風而至豈能辨其姦良況
礦砂乃天地自然之利非人力種植可得焉保其生生
不息今日有利聚之甚易他日利絕則散之甚難爾等
揆情度勢必不致聚聚生事庶幾可行若招商開廠設
官收稅傳聞遠近以致聚衆藏姦則斷不可行也

三年以江西撫臣奏封禁山事宜

特旨訓示江西巡撫裴率度遵

旨摺奏廣信府之封禁山相傳產銅舊名銅塘山明代即經封禁其中樹石充塞荒榛極目並無沃土可以資生亦無頑民盤踞在內此山開則擾累封則安寧歷有成案康熙五十九年鉛山匪類擒獲之後此山搜查二十餘日並無藏匿據實奏聞得

旨當開則不得因循當禁則不宜依違但不存貪功圖利

之心實心為地方興利除弊何事不可為也在秉公相度時宜而酌定之

五年封禁雲南中甸銅礦從總督鄂爾泰請也

又以湖南撫臣奏請開礦降

旨訓示湖南巡撫布蘭泰疏奏開礦事宜降

諭旨開採一事目前不無小利人聚衆多為害甚巨從來礦徒率皆五方匪類烏合於深山窮谷之中逐此末利今聚之甚易將來散之甚難也至於利之在公在私尚

屬細事爾果欲効忠蓋何必諄諄以利為言豈不聞有一利必有一害爾當權其利與害之輕重大小而行之耳

六年

賜安南國鉛廠山地四十里安南國王黎維禔上疏陳謝下部知之

又准廣西地方開採礦砂戶部議覆廣西巡撫金鉷疏言桂林府屬潯江等處各礦請招募本地殷

實商人自備資本開採所得礦砂以三歸公以七
給商其梧州府屬之芋莢山產有金砂請另委員
辦理再粵西貧瘠銅器稀少如開採得銅並請價
買以供鼓鑄均應如所請從之

九年禁止廢鐵出洋工部議覆刑部尚書勵廷儀
疏言天生五材鐵居其一用以備軍需而造器物
所係綦重向例鐵貨不許私出外境而廢鐵不在
禁例近聞射利之徒專收廢鐵鎔化運至近邊近

海地方貨賣此風漸不可長請嗣後有將廢鐵潛出邊境及海洋貨賣者照越販硝磺之律科斷以除姦獎應如所請從之

互見市雜考

又禁洋船收買鐵鍋廣東布政使楊永斌條奏定例鐵器不許出境貨賣而洋船私帶禁止尤嚴粵東所產鐵鍋每連約重二十觔查雍正七八九年夷船出口每船所買鐵鍋少者一百連二三百連不等多者至五百連併有至一千連者計算每年

出洋之鐵約一二萬觔誠有關係請照廢鐵之
例一體嚴禁違者船戶人等照例治罪官役通同
徇縱照狗縱廢鐵例議處嗣後令海關監督詳加
稽察至商船煮食器具銅砂鍋俱屬可用非必
盡需鐵鍋亦無不便外夷之處於朝廷柔懷遠人
之德意並無違礙奉

旨鐵觔不許出洋例有明禁而廣東夷船每年收買鐵鍋
甚多則與禁鐵出洋之功今不符矣楊永斌所奏甚是

嗣後稽察禁止及官員處分商人船戶治罪之處悉照查禁則他省洋船出口之處亦當一體遵行永著為例嗣是十年以湖南產鐵展轉運販應給

與印照令沿途關隘查照放行

互見市
糴考

乾隆六年准開滇省卑浙塊澤二鉛廠并試開東川者海地方鉛廠戶部覆准雲南巡撫張允隨奏稱滇省存廠運局鉛觔應預為籌畫請將曲靖府屬之卑浙塊澤二廠准其照舊開採所出鉛觔按

例抽課再該署督奏稱東川府所屬之者海地方亦產有鉛礦距東局路止二站應令該署督張允隨將前項鉛礦查明作速採試得

旨如議行

七年奏定川省銅鉛開採事宜戶部議覆四川巡撫碩色奏言建昌道所屬之迤北沙溝紫古喇三銅廠川東道所轄雲陽界連奉節縣之銅鉛礦廠永寧道所轄長寧縣之茶山溝鉛廠並無妨礙田

園廬舍取礦煎試每礦一觔約可煎淨銅鉛三四兩不等實屬旺盛應准其開採所出銅鉛除抽課之外商民所得銅鉛照例收買以供鼓鑄至開採礦廠人衆事繁若不委員專司經理難免滋事透漏應准其酌委佐雜幹員分廠經管專司抽課稽查約束并於建昌雲陽長寧三處各委官一員一年期滿於要隘處所不時巡查并將各商煎出銅觔給票登記如與抽課印簿不符及私煎等弊即

將本商爐頭責革另募殷商充補再黑白鉛觔俱
係鼓鑄所需長寧雲陽等處應准其招商開採照
例二八抽課每年將細數按季造報歲底具題仍
將廠名處所預行造冊送部以備查核得

旨如議行

八年定湖北湖南兩省礦廠開閉事宜戶部議覆
前任湖廣總督孫嘉淦疏稱原任左副都御史仲
永檀條奏楚省出產銅鉛等礦一案查楚省產礦

之地頗多而開有成效之處甚少若不悉心籌畫
因地制宜濫請開採適滋擾累今除湖南常寧縣
屬之龍旺山礦廠先曾創試係黑鉛粗砂且不敷
工本隨經封停在案又沅陵辰谿永順桑植等縣
礦廠並綏寧縣銅礦會同縣金礦宜章縣錫礦及
湖北施南興國竹山等府州縣礦廠或屬苗疆或
有妨田園廬墓或產砂微細並無成效無人承採
均應飭令地方官嚴加封禁他如湖南之邵陽武

岡慈利安化永定等州縣鐵礦俱係各該居民農隙自創以供農器間有產鐵旺盛之芷江縣挑往隣邑售賣應聽商民自便至於郴桂二州礦廠雖係銅鉛夾雜然地方既非苗徭又無妨礙自應聽其開採抽得稅銅砂價鉛觔並收買商銅於鼓鑄庫帑洵有裨益應如所奏疏上從之

九年准粵東開採銅礦兩廣總督那蘇圖等奏稱粵東開採礦廠自康熙三十八九年以來議開議

停已非一次第以錢文日少民用日絀鼓鑄一事
萬難緩待粵東現有礦廠棄而不取是猶坐守倉
廩而無術療饑非計之得也況粵東山多田少應
募工丁斷非有田可耕有地可種之農圃是開採
礦廠兼可為撫養貧民之計似宜將現在報出銅
鉛各礦先行試採自廣州肇慶二府起由近至遠
以少及多砂旺即開砂弱即止陸續酌量抽課至
於金銀二礦民多競趨恐轉於鼓鑄有礙應請照

舊封閉凡銅礦內有夾帶銀屑為數甚微者仍准開採抽課下部議行

十一年定粵西銅廠加二抽課戶部覆准署廣西巡撫托庸奏粵西開爐以來銅餉每不能接濟臣前奏請三分抽課七分聽商自賣仍於商本不敷試辦八月不能有濟懇將商辦銅餉仍照加二收課餘銅每百觔給以十六兩二錢之價收買應如所奏從之

十二年以粵西礦廠飭委道員查核廣西巡撫鄧
昌奏粵西一省地居邊徼向來額賦無多所有各
處礦廠原為湊充兵餉之用雖各廠出砂之多寡
抽課之盈絀自有不同而走漏侵隱之弊所在不
免請令分守蒼梧道及分巡左江右江二道員將
所轄各廠抽收課銀就近稽查確核從之

十五年開浙省溫處兩郡採鐵之禁戶部議覆閩
浙總督喀爾吉善疏言五金之產為天地自然之

利如果經理得人設法開採原足以便民生而資
罷用第恐防閑不密料理未周每致紛擾滋事是
以向有查禁之例浙省處州府屬之雲和等縣前
經撫臣常安奏請舉行封禁今據該督等奏稱處
州府屬之雲和松陽遂昌青田四縣并温州府屬
之永嘉平陽二縣及附於平邑淘洗之泰順一縣
土瘠民貧以採鐵為恒業封禁以後陽奉陰違徒
啟吏胥需索之弊況雲和等七縣俱係內地與近

海產鐵應行封禁之寧台等屬不同歷來並無潛藏奸匪透漏外洋等弊應照該督等所請仍弛其禁照舊開採以濟民生所有各項稅課亦應如所請令地方官勘明分則起科俟試行三年後再為酌中定額從之

十六年定湖南郴桂二州礦廠事宜湖南巡撫楊錫綏奏稱湖南省開採礦廠奏銷案內所有礦夫採獲銅砂以及黑白鉛砂於未煎鍊之前先抽砂

稅煎鍊之後乃稅銅鉛是砂稅一項非止黑鉛一砂銅砂白鉛砂俱應納稅惟黑鉛礦內銀鉛並產康熙雍正年間銀氣旺盛是以從前京商開挖時報抽銀稅後經封閉迨至乾隆七年原任巡撫許容奏請復開以黑鉛砂內出銀無幾不過滴汁成珠止堪賞給爐戶請將銀稅改為砂稅現今銀氣復旺自應隨時更正以復銀稅之名然不另立科條誠恐砂稅銀稅無由區別嗣後除銅砂白鉛砂

及無銀氣之黑鉛砂所抽稅銀仍名砂稅照舊辦理外其有銀之黑砂定為銀稅另立一條照例抽收列入奏銷冊內以備稽考又查榔桂二廠礦夫採獲銅鉛礦砂與商人煎煉每年砂稅共銀七八千兩商人廠卡各處丁役辛工飯食等項歲需三四千兩以砂稅之半取給已屬充裕請自乾隆十六年起抽收砂稅每十分內先歸官稅五分餘五分為商人廠卡公費既於商本無虧又於課務有

並從之

又加增湖南收買鉛觔價值戶部議各省分出產
黑鉛除貴州之外惟湖南最稱旺盛是以京局歲
需鉛七十萬餘觔前於黔省黑鉛短少不能辦解
案內臣部酌議題交湖南接辦每百觔照依康熙
雍正年間定價以二兩八錢三釐報銷節據湖南
巡撫奏稱工本不敷部議黑鉛關係京局鼓鑄必
上不虧帑下不病商方可經久黔省工本省而脚

價多湖南路近於黔以節省之腳費抵不敷之工
本辦理自覺從容應請嗣後湖南辦運除課鉛儘
數湊解無庸給價外其收買商鉛運京比照從前
貴州辦運之數每百觔定給腳價銀四兩六錢按
年解運照數支給從之

十七年派專員董理郴桂二州礦廠事宜加增收
買餘銅價值湖南巡撫范時綬奏言楚省開採礦
廠稅課攸關立法稽查理宜嚴密湖南郴桂二廠

據前撫楊錫紱於題請開採事宜案內請於各處
設卡巡防令該二州為監督衡永郴桂道為總理
經臣部覆准在案茲復據稱該二州駐劄州城離
廠窩遠不能親赴督查轉委親友家人料理舞樂
營私勢所不免請遴委專員彈壓凡一切領價報
銷及抽收稅課辦解銅鉛俱歸經手一年期滿新
舊更替造冊題銷並令該二州互相查察及州同
州判隨從協辦仍責成該道總理是責任各有攸

歸防範更為嚴密應如所奏辦理至郴桂二廠所
出銅觔原議每煉銅百觔除抽課二十觔外餘銅
八十觔給價九兩六錢收買據該省巡撫以定價
不敷商本採辦維艱請照前撫楊錫綬所奏每餘
銅八十觔給價銀十一兩二錢八分收買部議以
湖南產銅之區祇宜量為加增請照粵西定例每
出銅百觔除抽課二十觔外餘銅八十觔給價銀
十兩四錢則採辦自必從容不致有虧商本應令

該撫自題准之日為始照數支給報銷從之

二十三年准湖南郴桂二州廠稅俱歸官辦湖南
巡撫富勒渾奏言湖南省郴桂二州銅鉛礦廠從
前開採伊始一切估色設卡等事官役俱未諳悉
是以必須商辦邇年以來官役已經熟練而稅課
銅鉛較之從前有增無減是商人力所難辦之事
歸之廠員承辦實力稽查既有成效於廠務自有
裨益應如所奏從之

二十六年准甘省暫開騷狐泉礪礪大學士公傅
恒等議覆陝甘總督楊應琚奏請採硫礪以資儲
用查礪勛為營伍所必需遇有缺乏例得給批赴
產礪地方購買備用若以本地開採之礪供支各
營操防之用較之購自遠處實多節省茲訪得騷
狐泉礪自封閉後礪砂旺盛請照前例責成蘭
州府招商開採自屬籌備營伍之要應如所請辦
理至稱口外不產硫礪處所應需火藥現經行文

咨調一節查現今回部庫車等處俱有磺磺從前
用兵時曾經採取配用充裕即伊犁及烏魯木齊
一帶當日準噶爾亦用鎗炮又從何處購辦可見
口外原自不乏磺觔應請交與各該處辦事大臣
留心體訪向來產磺處所一體查明採購或附近
地方產有磺觔亦可採取配藥運往並可省內地
辦運之煩更為便益其現議騷狐泉開採事宜應
請交與該督委員妥辦毋令滋事從之

二十九年准四川屏山縣開採鐵礦四川總督阿爾泰奏屏山縣之李村石堰鳳村及利店茨黎榮丁等處產鐵每礦砂十觔可煎得生鐵三觔每歲計得生鐵三萬八千八百八十觔請照例開採十分抽二變價撥充兵餉戶部議如所請從之

又准雲南通海縣開採黑鉛廠雲南巡撫劉藻奏
通海縣逢里山廠產黑鉛試採有效請照例每百
觔抽正課十觔變價充餉餘課十觔以五觔充公

五勛為官役廉食所餘之鉛給價收買戶部議如所請從之

又准雲南彌勒州開採白鉛廠雲南巡撫劉藻奏
彌勒州野豬畊廠產白鉛試採有效請照例每百
勛抽正課十勛餘課十勛所餘之鉛給價收買撥
運廣西局鼓鑄於錢法實有裨益戶部議如所請
從之

三十年准四川江油縣開採鐵礦四川總督阿爾

奏江油縣木通溪和合硎等處產鐵每礦砂一十五觔可煎得生鐵四觔八兩每歲計得生鐵二萬九千一百六十觔請照例開採十分抽二變價撥充兵餉戶部議如所請從之

又停止陝西華陰縣開採黑鉛華陰縣之華陽川地方產黑鉛自乾隆十三年題准開採每年得鉛五六萬觔至十萬觔不等自二十三年以後得鉛日以減少至二十八年分僅得四百觔陝西撫臣

奏請停止戶部議如所請從之

三十一年准四川宜賓縣開採鐵礦四川總督阿爾泰奏宜賓縣濫壩等處產鐵每礦砂十觔煎得生鐵三觔整每歲計得生鐵九千七百二十觔照例十分抽二變價按年徵收撥充兵餉戶部議如所請從之

又准貴州清平縣開採鉛礦貴州巡撫方世雋奏清平縣之永興寨產黑鉛礦砂試採有效請准其

開採照例抽課每年可收課鉛一萬二三千觔除
支給各標營操演鉛觔外尚有餘剩存貯撥用戶
部議如所請從之

又准廣西融縣開採白鉛礦廣西巡撫宋邦綏奏
融縣四頂山產白鉛礦砂因無煤炭不能煎煉成
鉛而羅城縣冷崗山跣有煤路可以運往就煤煎
煉試採已有成效請准其開採煎煉照例每煉鉛
百觔抽正課二十觔撒散三觔造冊報部稽核戶

部議如所請從之

又酌定滇省開採礦廠事宜

詳見錢幣考

三十七年

諭滇省各銅廠前因馬驛短少柴米價昂每銅百觔准暫加價銀六錢俟軍務竣後停止嗣後展限一二年今念該省頻歲曾獲有秋而米糧柴炭等價值仍未即能平減著再加恩展限二年俾各資本寬餘踴躍開採庶於銅務有裨而廠民亦得以資充裕該撫仍

留心體察俟廠地物價一平即行奏明停止

皇朝文獻通考卷三十

欽定四庫全書

皇朝文獻通考卷三十一

征權考

六

雜征歛

山澤
津渡

順治二年以寺臣條奏蘆政傳

旨訓飭太常寺典簿王文言條奏江南長江一帶荻蘆數
千餘里中多腴地乞遣臺臣部臣以次清查立為
蘆政以充國用得

旨江南初經歸附治平急務惟在安民王文言何得借端
言利不准行

臣等謹按瀕江之地沙土隨水性遷移漸成洲渚
小民植蘆為業田曰洲田課曰蘆課上農耕治之
後即可以藝菽麥種秔稻與良田等非僅以菰蘆
萑葦之盛為地利也蓋大江兩岸坍漲靡常此落
彼淤有司者隨時親勘備書於冊越五年按籍履
畝而覆核之其坍沒於水者除賦水落沙長者分

年起徵以方田之法度其丈尺而乘除之其隔江對岸地分兩屬則令兩地牧令會勘酌其贏縮以定抵補之數順治九年暨十八年廷臣論奏蘆政利弊未嘗不採用之典簿王文言以小臣越職言事首論及此非真有度支盈絀之計特以

聖政維新覲恩澤於分外傳

旨申飭以深折之恭誦

聖諭治平急務惟在安民一語遂開我

朝億萬年樂利之休云

四年裁山東明季牙雜二稅從巡撫丁文盛請也
九年革除江陰青浦二縣坐派養牛雜稅戶部奏
言江陰青浦二縣有坐派養牛之稅實屬病民請
嚴飭督撫按臣行府州縣官將牛牙雜稅等項止
許於買賣市集照例抽收若有橫派鄉民者指名
叅處

又定蘆課五年丈量例工部奏言計臣王永吉按

臣秦世禎請以蘆課歸併有司誠以丈量催提等弊重為民擾也但各州縣正項錢糧尚虧定額恐蘆課零星分散逋欠益多今後蘆課應仍歸主事管理每五年一次量止丈新漲新坍之地漲者增額坍者開除不漲不坍毋得丈量以滋騷擾報可十八年准巡按御史條奏蘆課六弊戶部議覆巡按江寧御史何可化條奏蘆課六弊坍設之賠累宜豁收解之耗費宜革豪強之隱佔宜清洲書之

飛洒宜禁佃蠹之侵欠宜究蠲免之條例宜溥俱應如所請從之

又清查各省蘆政工部議覆工科給事中王曰高條奏蘆政利弊四款一嚴催征以懲積欠一清踏勘以核實數一按地形以清課額一酌久任以專責成俱應如所請得

旨江南江西湖廣每省差滿漢司官各一員嚴行清查

康熙二年免崇明縣加征蘆課江寧巡撫韓世琦

疏言崇明縣大糧田九千六十頃五十畝零除正賦外復征蘆課銀八千三百八十餘兩實係一田兩賦亟請蠲豁部議應如所請從之

六年免廣東雜稅四千兩有奇廣東巡撫王來任請免粵東雜稅四千有奇以甦民困部議不准

上特允之

十年准江南江西湖廣等省蘆課錢糧歸併地方官管理戶部奏江南江西湖廣蘆課錢糧原係地

方官按畝征收轉解監督衙門與各關差監督親收商稅者有別請嗣後停止差遣部員將蘆課錢糧歸併地方官管理從之

三十八年准內地商人往殺虎口外伐木入口販賣驗放輸稅工部議覆山西巡撫倭倫疏言殷實商人願往殺虎口外大青山等處採木者請令其赴部具呈給票守口官兵驗明放行輸稅入口販賣查殺虎口外從無砍木之例應將該撫所請毋

庸議得

旨內外之民俱屬一體大青山木伐賣商民均為有益著

照該撫所請行

四十八年除革私設牙行吏部議覆江南道監察御史張蓮條奏貿易貨物設立牙行例給官帖使平準物價乃地方棍徒於瓜果菜蔬等物亦私立牙行名色勒捐商民請敕部查稅課定例除應立牙行者照舊設立外其餘一切私設盡數除革

應如該御史所請從之

互見市
糴考

五十三年議准呼努呼河等處木植抽分差奉天
部院司官一員管理工部議覆

盛京工部侍郎貝和諾疏言呼努呼河等處商人所
販木植於十五根之內抽取一根請派

盛京各部才能司官一員抽分一年差滿更換應如
所請從之

雍正七年免貴州軍田上契稅銀戶部覆准雲貴

廣西總督鄂爾泰疏言原任工部侍郎申大成條
奏黔省軍田許照民田一體買賣每畝上稅銀五
錢給契為業經九卿議覆准行但黔省軍田一畝
之價可買民田二畝應納糧賦一畝亦可抵民田
二畝其每畝上契稅銀仰請豁免嗣後凡有軍田
授受悉照常例報稅從之

十年免西寧煤稅奉

諭旨朕聞西寧北川口外白塔地方出產石煤附近漢土

番回民人究取販賣以為生計每馱納稅錢三十文西寧府委員收解充餉約計每年收銀一千九百餘兩近因西陲用兵之際西寧移駐兵弁較前為多率皆用煤以供炊爨煤價漸至昂貴若仍照例征收稅銀恐價值不能平減於兵民均有未便著將應收稅銀寬免

十一年飭令各省額設牙帖報部存案

諭內閣各省商牙雜稅額設牙帖俱由藩司衙門頒發不許州縣濫給所以防增添之弊不使貽累於商民也近

聞各省牙帖歲有增添即如各集場中有雜貨小販向
來無籍牙行者今概行給帖而市井奸牙遂恃此把持
抽分利息是集場多一牙戶即商民多一苦累甚非平
價通商之本意著直省督撫飭令各該藩司因地制宜
著為定額報部存案不許有司任意增添嗣後止將額
內退帖頂補之處查明換給再有新開集場應設牙行
者酌定名數給發亦報部存案庶貿易小民永免牙行

苛索之累

互見市
糴考

十二年免黔省遵義府各山場小稅雲南廣西總督尹繼善等疏奏黔省遵義府除遵義仁懷兩大稅之外又有遵義縣小板山場綏陽縣永興山場桐梓縣新街山場共小稅銀四百十九兩零到場之物皆係遵義仁懷兩大稅處已經征稅者查黔省原有各山場小稅久經豁免遵義向隸川省是以仍循舊規今既改隸黔省應請一例邀免以除民累得

旨遵義等縣山場小稅著照黔省通例一併加恩豁免

十三年禁止契紙契根并停征收稅課議叙之例

奉

諭旨民間買賣田房例應買主輸稅交官官用印信鈐
蓋契紙所以杜奸民捏造文券之弊原非為增課也
後經田文鏡創為契紙契根之法預用布政司印信
發給州縣行之既久書吏夤緣為奸需索之費數十
倍於從前徒飽吏役之壑甚為閭閻之累不可不嚴

行禁止嗣後民間買賣田房仍照舊例自行立契按則納稅地方官不得額外多取絲毫將契紙契根之法永行禁止至於活契典業者乃民間一時借貸銀錢原不在買賣納稅之例嗣後聽其自便不必投契用印收取稅銀其地方官征收稅銀多者停其議叙乾隆元年除近海居民雜稅戶部覆准尚書甘汝來奏言邊海之地居民採捕魚蝦藉以活命其船則用單桅不能出洋貿易向祇於本縣給照稽其

出入並不輸稅近聞各海關監督雖單桅船隻亦
令請領關牌同雙桅出洋貿易之船一體輸鈔無
論輸鈔之多寡即請領關牌一次已需規例四五
兩不等請查明海疆單桅捕魚之船概免領牌輸
餉庶海額貧民得有生計至近海貧民資生無業
有用竹笊取魚者有於埠頭養鴨者閩廣之間悉
按笊按埠征稅此項稅銀無多既非額稅所有即
係官吏私征應令各該撫查明禁止從之

免廣東歸善海豐惠來潮陽四縣加額漁稅並免
粵東埤租奉

諭旨廣東山海與區貧民多以捕魚為業各縣俱有額
征海課為數無多相沿已久後因歸善縣不肖知縣
私取陋規加於額征十數倍遂經撫臣定議加增魚
稅一千餘兩作為盈餘而海豐惠來潮陽三縣亦仿
照加增海豐縣則增至四千餘兩惠來縣增至五百
兩潮陽縣增至七百餘兩朕思粵東山多田少小民

生計艱辛故以捕魚為養贍之計今他縣漁租皆仍舊額而歸善等四縣獨征收加重恐漁民輸納維艱非國家愛養黎元之意著將四縣加增之數悉行豁免仍照原額征收其捕魚小船尤不應在輸稅之內再查粵東有埠租一項亦民間自收之微利前經地方官通查歸公為湊修園基之費夫園基既動公項銀兩修築則埠租一項亦著一體免征以免閭閻之煩擾該督撫可轉飭有司實力奉行毋使奸胥地棍

借端私取致窮民不得均沾實惠

又免湖北太和山香稅奉

諭旨山東泰安州香稅朕已降旨豁免近聞湖北太和山凡遠近進香者亦有香稅一項著照泰安州之例永行豁免該督撫即飭令地方官實力奉行毋使奸胥土棍巧取滋弊

又復各直省契尾舊例廣東巡撫楊永斌奏向來未設契紙以前凡民間執契投稅官給司頒契尾

一紙粘連鈐印令民間收執為據蓋因田房稅契銀兩贏縮不齊若止就民間自立之契印稅則藩司衙門無數可稽不肖官吏得以私收飽橐而且民間交易之後往往延挨不稅候至官員離任之頃假託親知書吏或乞恩蓋印或量減稅銀彼匆忙解組之員多寡視為幸獲豈能審察致詳於是遂有捏造假契乘機投稅致滋訐訟不休者是以會典開載凡買田地房產必用布政使契尾非惟

防私徵亦所以杜捏造也迨後因用契紙而契尾之例遂爾停止今契紙既已革除而契尾尚未復設臣思契尾之例係投契之時官為印給不同契紙第由民間價買致有滋擾可比似應仍請復設照依舊例由布政使編給各屬令地方官粘連民契之後鈐印給發每歲奏銷之時將用過契尾數目申報藩司查考其稅銀如有贏縮仍令儘收儘解庶可杜官吏侵收與奸民捏造之弊經王大臣

會同戶部議奏得

旨如所請行

四年開三道溝及熱河八溝等處煤窰戶部議
覆直隸提督永常奏三道溝至熱河八溝等處產煤
之所請開挖煤窰以天地自然之利惠及兵民固
屬因地制宜之法但三道溝等處俱係邊關塞外
地方遼濶一設窰座人民叢集自應稽查防範並
剴知欽天監委員前往相度於

行宮有無妨碍是日面奉

諭旨古北口外三道溝等處請開煤窑朕祇期於地方並無滋擾兵民實有裨益至於行宮不過暫時巡幸之所其有無妨碍不必議及

又以牙帖歲增令各省嚴加核實奉

諭旨昔我

皇考惠養商民恐州縣牙行歲有增添以致奸棍爭奪抽分利息為閭閻之擾累於雍正十一年

特諭令直省因地制宜著為定額報部存案不許有司任意增添所降

諭旨甚明近聞江蘇各屬於額帖之外陸續請增者一縣竟有數十張以至百餘張不等此必州縣官員才識短淺聽信吏胥播弄借新開集場准其添設之例或舊業而捏為新設或裁牙而混詳改充徒使貿易小民受其苛索莫可申訴江蘇如此則各省亦必皆然著該部即通行各省督撫該地方果有新開集場應

設牙行者由府州核實詳司給發牙帖如非新開集
場而朦混請添者即行題叅從重議處

至五年議定清釐牙行之例向例每行認充經紀
取具同行互保一人出具殷實良民甘結該管官
加結送司給帖充應互結雖有殷實字樣而互保
之責成未經議及今定鋪家拖累商人者將本牙
行帖追繳勒限清還仍行給與若係牙行誑騙商
人將互保行帖一併追繳勒限清還本牙更換互

保行帖仍行給與倘逾限不完將互保之人一并
更換牙行惟圖用錢任舖戶坑騙客商者除逾限
不完將牙行革退外仍將舖戶責限追比其不足
之項令牙行賠補牙行侵吞客賬者除逾限不完
將本牙互保一體斥革外仍將本牙責限追比其
不足之項令互保攤賠其追比之限期按欠數之
多寡酌定至於以後客之貨挪補前客之欠移弱
客之貨代償強客之欠該互保先行舉首免其治

罪客隱者責令分賠牙行夥計人等侵吞容賬總
照牙行侵吞之例追帖賠補

互見市
糴考

五年奉

諭旨民間懋遷有無官立牙行以評物價便商賈其頂
冒把持者俱有嚴禁近聞外省衙門胥役多有更名
捏姓兼充牙行者此輩倚勢作奸壟斷取利必致魚
肉商民被害之人又因其衙門情熟莫敢申訴其為
市廛之蠹尤非尋常頂冒把持者可比所當亟為查

禁嗣後胥役人等冒充牙行作何定例嚴禁及地方
官失於查察作何處分之處交該部定議具奏尋議
各省衙門胥役現在更名捏姓兼充牙行者令地
方官嚴查確實即行追帖勒令歇業並將胥役充
補牙行之處永行嚴禁倘不法胥役仍敢更名捏
姓兼充牙行應照更名重役例治罪侵食客貨貽
累商人者發附近充軍該管官照例議處載入則
例遵行從之

准東省濟南等府開挖煤窰戶部議覆山東巡撫
朱定元疏稱東省生齒日繁山林所產樵蘇價值
倍於往昔必須煤炭接濟查濟南府屬之章邱淄
川泰安府屬之泰安新泰萊蕪肥城兗州府屬之
寧陽滕縣嶧縣泗水沂州府屬之蘭山郯城費縣
蒙陰莒州青州府屬之益都臨朐博山登州府屬
之萊陽海陽等州縣俱有煤可採今議於產煤之
處每窰立一窰戶民地以地主為窰戶其官山官

地以領帖輸稅之人為窩戶照當稅之例領帖辦稅凡有僱用人夫必用本籍之人取具地隣等各結無許外方人等充冒致生事端從之

六年革除牙稅積弊戶部覆准河南巡撫雅爾圖奏稱懋遷有無小民日用之常而抽收稅課設立牙行所以通商賈而息爭端其有私收把持者均干禁例查牙戶一項原因從前州縣任意增添濫行給帖是以著為定額毋許額外增添其有把持

壟斷朋夥私充者例有治罪之條地方官理應實力奉行豈容於額設牙行之外另立名色擾累商民今該撫所奏各省貿易集場及零星口岸於額設牙行之外豈復有集主包頭攬頭名色朋比攘據任意勒索實為商民之累自當通查禁革清除積弊以便商民應行令各省督撫轉飭各該地方官嚴查禁革倘地方官奉行不力復滋前項弊竇亦即指名查叅從之

八年免浙江玉環塗稅奉

諭旨浙省溫台二洋為漁船採捕之所從前玉環未經
展復以前凡漁船在洋採捕者汎兵需索陋規無異
私稅後因展復玉環該地方官惟恐經費無出遂將
陋規改收塗稅以資經費之不足此一時權宜之計
也而每年所委徵末員弁及丁役人等往往借端苛
索朕思濱海編氓以海為田每歲出沒於風濤之中
捕魚以餬其口生計淡泊應加軫恤況自玉環展復

以來地方所有錢糧已敷公事之用無庸更收塗稅
著將此項永遠革除

九年定稽察參山積弊事宜舊例商人領票辦參
每票一張一人兩馱前往剗採而領票之人早已
雇夫出口每票一張或三四人五六人不等經奉
天將軍奏稱與其聽伊私雇人夫任意剗採不若
嚴定人數給發腰牌請嗣後每領官票一張准其
三人出口一人守馱炊爨兩人入山剗採給發腰

牌三面以別真偽至包攬飛參之棍徒應與產礦
山場礦徒潛行偷挖約練接濟夥同分利者同科
請嗣後拏獲包送飛參之人亦照此律究治惟是
邊門所轄鞭長莫及難以防範如威遠堡邊門路
通寧古塔黑龍江兩省商賈車輛往來不絕又如
英額江清二門雖無車輛出入多有馬馱私運至
鹵廠駿河兩門並應添巡緝即在各屬員內調補
三年更換戶部議覆俱應如所奏從之

十一年准湖南衡州府城設立牙行戶部覆准湖
廣總督鄂彌達等疏稱郴桂二州界址雖屬毗連
其水路所通一由永興來陽地境出衡郡大河一
由常寧地界出衡郡大河河道既分運行各別其
附近處所惟衡州府城為該二州往來舟楫必由
之道實為總會處所應於衡州府城設立牙行頒
給印烙官秤先儘採買後儘客販當面議價該牙
止在旁眼同兌交銀兩貨物以免爭競該牙行如

有壅斷把持哄誘代買以及虧欠客本等弊即行
究革勒追另募項充從之

又免廣東瓊州府牛新等項無著稅銀廣東瓊州
府屬有應征牛新等項稅銀四千二百餘兩載全
書例應征納經該督撫查奏此項稅銀內有無著
銀一千七百餘兩實係畸零小戶難以照舊派征
奉

特旨永行豁免

十四年定應城縣征收石膏稅額署湖廣總督新
柱奏言查得應城縣石膏征稅一項征之於產膏
地方之商民者則曰商稅征之於評膏價之經紀
者則曰行稅征之河下裝運石膏之船戶者則曰
河稅歷來照數征收報解今委員監收一年期滿
監收膏稅正餘并商行河稅銀共四千一十八兩
九錢八分零內除膏稅正額及耗羨并商行河稅
以及經巡紙筆飯食暨贏餘項下解費銀兩外實

贏餘銀二千二百六十兩九錢七分八釐零其征收膏稅已奉發有循環簿登填其秤係照部法較準逐船查秤設立木櫃令商人親填完納部議應如所請得

旨允行

又更定稅契之法先是民間買賣田房應買主輸稅交官官用印信鈐蓋契紙以杜奸民捏造文契之弊經田文鏡創為契紙契根之法於雍正十三

年特奉

諭旨停止又於乾隆元年經廣東巡撫楊永斌奏請仍
復契尾舊例覆准通行至是戶部議駁河南布政
使富明疏奏請於業戶納稅時將契尾粘連用印
存貯每遇十號申送知府直隸州查對不知契尾
經一衙門即多一衙門之停擱由一吏胥即多一
吏胥之苛求甚且捐勘駁查以致業戶經年累月
求一執照寧家而不可得應將所奏毋庸議臣等

酌議請嗣後布政使頒發給民契尾格式編列號數前半幅照常細書業戶等姓名買賣田房數目價銀稅銀若干後半幅於空白處預鈐司印以備投稅時將契價稅銀數目大字填寫鈐印之處令業戶看明當面騎字截開前幅給業戶收執後幅同季冊彙送布政使查核此係一行筆跡平分為二大小數目委難改換庶契尾無停攔之虞而契價無參差之弊疏上如議行

十七年停止大宛二縣鋪面行稅三年編審之例
改為按年征收戶部議覆直隸總督方觀承等奏
稱大興宛平二縣鋪面行稅舊例分別上中二戶
按則征收三年編審一次原以杜隱漏之弊惟是
編定之後如過該年鋪面減少則將下戶陞作中
戶中戶陞作上戶加征稅銀以符前數商民不無
苦累如遇該年鋪面增多稅亦因之而多而報解
仍止此數徒供官吏之侵蝕行欲稅之征收皆歸

實在誠莫若於鋪面之開閉隨時考核應請於每
年二月令該二縣將各行鋪親身查點一次分別
資本充裕者列為上戶照例歲征銀五兩稍次者
列為中戶照例歲征銀二兩五錢並於由單內填
註明白地方官祇須按鋪給單按單收稅無俟假
手吏胥紛紛查報應如所奏從之

二十年定蘆洲地畝坍戶以次撥補之例江西巡
撫胡寶瑤奏言蘆洲地畝坍漲靡常舊制五年丈

量一次漲陞坍除嗣於乾隆十三年經部定議凡有坍塌洲地即令業戶報官勘明註冊立案遇有淤漲按照報坍先後以次撥補倘有餘剩新淤官地召民認墾按則陞科通行遵照惟是蘆洲有有課無課之分凡濱江洲地先由水影次變沙灘又次為泥灘為草塌為草坦至於漸積成洲然後納課計自水影以至成洲必經數十年或十餘年之久其成洲頗費工本及遇塌卸必屆大丈之年始

行除課若有淤漲之地自應按照報坍先後俾復其業以完課額至於水影沙灘等類原無工本可費是以例不陞課即有坍卸自不在撥補之列乃有奸猾之徒因定例未經分晰指明往往以無課之沙灘等項混爭撥補請嗣後將有課之洲報坍者挨順先後彙為一冊按次撥補庶課額既定訟端可弭經部議覆應如所請凡濱江新漲之地查原舊有課之洲報坍者次第撥補至於水影沙灘

等項雖稱未經陞課但小民承認多年希圖成業
一遇坍塌既不得與有課坍戶一例撥補至撥補
餘剩之地若不量為准撥恐失業之戶未肯甘心
彼此復啟爭端情理殊未平允應令嗣後新漲地
畝除儘有課坍戶補足之外尚有餘地即將無課
坍戶按照報坍先後酌量撥補再有餘剩始行召
墾仍嚴行各洲戶安分息爭一聽官撥分別辦理
疏上得

旨如議行

二十一年准

盛京大那祿等山場招商砍木納稅

盛京侍郎清祿奉寬奏大那祿山九處山場請勒限

三年仍給各商領票砍木納稅至三年期滿仍將
九處山場撥給台丁砍木如台丁內有不願領票
者照例招商承領輸納稅課得

旨允行

二十三年核定順天府屬額設牙行順天府尹劉
綸等疏稱順天府通判所屬牙行額設一千七十
二名除節次裁去各牙一百五十八名外實在存
留牙行八百四十九名連崇文門經紀四十二名
每年共應征銀一千五百兩有奇著為定額至議
裁之燒酒瓜茄青菜共二十三名停其募補并嚴
禁坐地奸賈暗取牙錢其實係自置自買以及零
星肩挑背負售賣者不得使該牙等藉端需索從

之

二十四年定山西穆納山征收木植稅課山西穆納山木植久經封禁該處奸商藉此射利潛行偷砍地方胥吏需索勒詐每滋弊端

上命戶部郎中英廉會同巡撫塔永寧前往各山溝逐細履勘具奏產木山場共有四十七處屢經砍伐而可用之材尚多但山場荒僻路徑叢雜與黃河磴口處處相接可通水運亟應仰遵

諭旨寬弛其禁招商砍伐按料給與蒙古山價既可為
養贍窮乏蒙古之資材木運入內地又可供官民
興作之用謹將招商開採設口稽查各事宜逐一
詳議一稅口宜互相稽查也查穆納山木植運至
山口即就山口驗量鑿用稅廠斧印派附近駐劄
之薩拉齊協理通判兼司辦理至上游磴口木植
必由查漢庫連磴口與托克托城河口兩處匯集
或就近由陸路發往歸化城抑或竟由水路赴殺

虎口河保營轉運各處售賣請於兩處各設立稅口責成各該駐劄之通判經管並令歸綏道專司稽查以專責成一稅課山價宜彙同征收分別解給也查從前議定商人認買穆納山木植每料長七尺厚七寸寬一尺交官價二錢八分今運送稍艱請酌中定以每料收木稅銀一錢二分至山價一項乾隆十七年奏定每料給與一錢今應仰體裨益蒙古之

恩旨每料酌增二分亦以一錢二分酌給行知烏喇特
扎薩克差員赴歸綏道衙門領回養贍所屬窮乏
蒙古每兩隨稅耗銀一錢以為吏役飯食巡船紙
張之用一商人工丁宜定數約束以免滋擾蒙古
也今酌議召募殷實諳練者為商總其散商或三
四人或五六人不得過六名之數每商一名其名
下砍運工丁不得過一百名給與該商人印照指
定山溝分編字號在山代運一稅廠應按時分別

開停也查穆納山木植非藉黃河水運不能致遠
黃河每年十月立冬水合至三月清明後水泮方
能行運兩處稅口即以酌定啟閉日期通報至開
採數年之後大木無有所有商丁自應概行查逐
出山以免逗留滋事從之

二十五年定湖廣漢口等鎮牙行稅額湖廣總督
蘇昌議覆湖北布政使公泰條奏牙行所完牙稅
皆有上中下三等之殊江西牙稅上則納銀三兩

中則納銀二兩下則納銀一兩湖北四通八達漢口一鎮更為九省通衢商賈輻輳不減江浙等省乃檢查報部稅冊自黃州鄖陽與漢口等處比較輕重失宜應請將通省各牙行酌中定議上行完稅銀二兩中行完稅銀一兩下行完稅銀五錢查湖北漢口富商大賈絡繹往來洵屬貿易最盛之地其他如荊州府之沙市草市襄陽府屬之樊城安陸府屬之岳家口等處雖在市集亦稱繁盛

而往來客貨已較遜於漢口其餘州縣之鄉村小鎮所有商販多係小本經營牙儉不過微利餬口不但與漢鎮懸殊即較之草市等處情形迥別今若改征稅銀較之舊時上行加增三倍中下行俱加增兩倍有餘恐簡僻州縣鄉村小鎮之牙行完納不前轉致有名無實請將漢口草市沙市樊城岳家口等處牙行按照上中下則上行完稅銀二兩中行完稅銀一兩下行完稅銀五錢其餘僻邑

村鎮上行完稅銀一兩中行完稅銀五錢下行完
稅銀三錢其黃州鄖陽二處牙稅一體改正從之
二十六年議准徵收殺虎口油酒烟餉稅課并令
守口員弁毋得禁止出口農器戶部議覆前任殺
虎口監督期成額奏言口外烟油酒三項向係由
內地興販出口赴彼貿易是以該處並未定有起
課之則今蒙古地方頗種烟葉雜糧口內民人赴
彼造作油酒烟餉在歸化城一帶村庄售賣應行

令現任殺虎口監督將此三項與皮張雜貨均附
於落地木稅按則抽納至奏稱鐵器到口收課守
口員弁人等以久干禁例不准出口查戶部頒行
關稅全書內鋤杓鋤犁等項俱經列有科則並未
禁其出口嗣後行令監督詳細查明除廢鐵鐵料
仍照舊禁止外如祇係農器及民間日用器物即
行按則征稅將名色件數註於票內毋庸禁止從
之

二十七年定烏魯木齊鋪面園圃分等收稅利駐
劄烏魯木齊大臣旌額理奏該處商賈開設鋪面
房五百餘間墾種園圃三百餘畝視其生理大小
作為三等其園圃按年薄征從之

臣等謹按鋪面開設即日中為市之義以兼奏園
圃生理故入雜征其他計鋪面收稅者概入關市
門類

二十八年議准在京牙帖額能通融頂補戶部議

覆順天府尹錢汝誠等疏稱在京各項經紀多寡
不齊一牙一帖統計額缺八百九十一名征輸稅
銀一千五百三十一兩例由順天府通判管理遇
有事故懸缺報明募補復定為五年編審一次將
各牙實在情形查明覆核現在桐油棉花綢緞藥
材等項帖多貨少陸續告退六十四名乏人充補
又白炭江米銅鉛等項帖少貨多分派城市不敷
評價此絀彼盈難於酌劑請將現在懸帖六十四

張發司查銷所遺懸缺即於貨多帖少之行准其
認補飭司給帖按則輸稅實征實解總不得逾原
定牙帖八百九十一名之額使額帖不致虛懸虧
課而市僧亦無從壟斷居竒自屬因時制宜酌劑
變通之法應如所奏從之

三十一年令民間稅契無司頒契尾者首明即行
補給其稅銀於原經手之州縣名下追完奉

諭旨前據湖北按察使雷暢條奏民間田房稅契不粘

連司印契尾者立限一年令業戶首明補稅以杜侵
隱而稽假冒經戶部覆准並令各督撫分別定限報
部查核夫隱匿漏稅若在民間自應查明令其補交
若州縣官辦理稅契於契紙內鈐蓋印信並不粘用
司印契尾是係不肖有司意圖侵肥入己所致其實
小民應投稅銀業已照數輸納今乃令業戶首明補
稅而不於原稅之州縣名下追還是百姓受重稅之
累而侵隱之官吏轉安享其利於情理殊未得平著

各該督撫詳悉出示曉諭凡民間有已經報稅並無
司頒契尾者令其據實首明即行補給契尾其契銀
毋庸重複補納以恤民力並查係何員任內經手除
事在五年以前及該員已經身故者查明免其勒追
外其現任及陞調各員著照原稅銀數於各名下定
限追完此次立法已後如再有止鈐契紙不連用契
尾者各督撫即行查叅治罪如此則閭閻既免重科
州縣共知儆惕將來小契之弊亦可不禁自止著將

此通諭知之

定稅契申送道府直隸州查驗之例戶部議覆直隸按察使裴宗錫奏民間置產投稅布政使頒發契尾久經定例惟是法久弊生或有官吏串通將所填契尾前半幅之給民者開寫實數後半幅之送司者開寫虛數以百改十以千改百徵多報少希圖侵蝕請令該管之道府直隸州核轉固屬剔弊之法但契價多寡不同概令申送驗發事屬繁

瑣臣等酌議嗣後州縣給發契尾如契價在千兩以下者仍照舊辦理毋庸申送查驗其契價在千兩以上者應如所請令各州縣將所填契尾粘連業戶原契按月申送知府直隸州查驗直隸州則申送該管道員查驗相符即將契裁兩半定限十日發還州縣一給業戶收領一彙送藩司稽核逾限不給者分別議處至田房稅契例應州縣衙門填給契尾經管征收查各處竟有由佐雜官征收

者亦宜統歸正印官經管以昭畫一從之

四十八年

諭據慶桂奏掣獲吉林等處私行挖參人犯永瑋因朕
恭謁

祖陵前往辦理供應事宜是以見未及此著將慶桂奏摺
抄錄寄永瑋閱看並著伊派委妥幹官兵于產參山
廠通衢要隘及山谿僻處嚴行搜緝近年封廠停採
原期護養參苗令其滋長今吉林等處掣獲私挖人

犯至百餘名之多是有封閉之名而無其實反令不
肖之徒得以倖獲何若仍行放粟開採之為愈也著
自明年為始仍行放粟開採

皇朝文獻通考卷三十一